

喙

鳴

文

集

喙鳴文集卷十八目錄

行狀

張東沙行狀

余文敏公行狀

呂文安公行狀

汪遠峰行狀

王熙宇行狀

沈肖山行狀

王見菴內子程氏行狀

喙鳴文集卷十八

四明 沈一貫肩吾 著

行狀

南京兵部尚書東沙張公行狀

始大司馬張公常著無竒生傳蓋自敘而余族父
句章山人大司成同麓先生鄉進士余寅太學生
王穉登皆為司馬立傳張公卒子邦仁等以狀屬
一貫一貫方執經上前未有間間覽五傳者而牽
組成之取其文實顯白狀曰張公諱時徹字惟靜

先宋魏國忠獻公沒南軒先生栻為蜀人四世有
諱原者家于鄧槎湖是為槎湖始原生紳紳生儒
儒生惠惠生迥迥生叔誼誼生曦曦生緒封通議
大夫兵部右侍郎配封洲人吾宗四世姑也生三
子季曰忭封如緒官配孫洲人生公及仲敷季檄
公之生也大父夢龍乘於危稍長英英奇見矣就
外傳傳弗省顧劣公文定公見而識之勗以卒學
文定公者名邦奇貞亮博醇起家翰林先公十年
亦為留京大司馬於公子行也而公師之遂成名

公亦年十七而抗顏為人師弟子二十餘曹率長
於先生者也二十舉于鄉二十四進士高等為郎
八年皆從留都轉始膳部主事遷武選員外郎儀
部郎中南曹務簡一時仕者有呂公枬鄒公守益
顧公夢圭王公積石公簡盡名士公日與劇切期
之大道不忍以其身悠悠生平裒蘊始基此矣三
十二以副使督學江西簡才汰不肖抱公絕私關
說無所入於桀史尤恣勅會宮廟災言者謂副使
苛諸生左遷蓋請寄者嗾之也以副使備兵臨清

人或言公且稍已威公弗渝臨清走京師道五方
賈糴至居繡繒諸奇貨前吏率獵取以驩客公獨
不吝亦無或譁矯矯持衡尺不縱虢不苛小繹素
滿前訊決立盡有匿不吐實者曰汝罪當其律令
為護加汝笞久之民不訊而承矣徼巡周審行者
不以弓矢境內稱平稍遷福建叅政建藩素簡公
不敢謂簡其分司獨卹卹終日而視篆者閉門卧
視篆亦復卹卹終日而分司者閉門卧繙閱故牘
以紀百物故公之智益集夫人才猷不相遠勤惰

分而敏不敏異舉大物無勤哉福建郵更無準豪
者虎而噉其鄉為度訾筭占徭籍令歲按行之汀
民胡賤仔孩而孤宗人利其質誣為尺籍子賄其
主者來攝賤仔積不白公偵賤仔有母詰之母怨
其嫡之奪而嫁已也不肯言覆用左語賤仔得不
去胡氏叅政四年不調調乃得雲南按察使於是
文定公為少宰故緩滇汝每論囚昆明遣其屬不
死者還率市獠掠而逸公命毋還繫之梟園囚得
自火而食或焚而逸公命獄吏饋之不省視者罰

之故囚無死矣死矣瘦者霜雪益土金匱寶者疲
而驚雖坐法不得決公立撲殺之衆快焉指揮范
俊老而舉一子弟傑覲其官挾子之目而訟曰瞽
非俊子公一訊而坐傑李知縣女與匠者私諸子
殺匠而逸長子曰不可以令我父老而入獄自繫
之官官猶捕諸子公曰此義憤也罪不中死而當
之死何居於是入白御史盡釋之家衆乃還曰張
公生我世世尸而祝焉遷山東右布政使比之郊
黔國不觴而諸賈人觴曰吾儕小人之恃寶玉金

錫象齒以生也竭力以赴吏而不免也公獨無求
異矣而諸舍人奉公教憚憚尤異廬尊市牖敢用
薦公願為舍人羞而黔國多不法嘗禱旱而關釀
者公曰是不有天子吏乎縱之無令益旱故殺其
禮以釋憾人謂公之郊可以觀政矣山東左使者
猜而弗決間者公攝焉問曰有滯牘乎曰然口質
手析十餘篋三日畢有淹計乎曰然呼之來數十
百人憑几而遣之旬日畢問諸曹吏胡不事事曰
懼譴死匿矣下令令來歸歸者五十餘人是歲省

試士錄成文多出公手惟外艱歸起復湖廣右使
楚世子弑其君諸大夫陳兵出入公曰毋搖衆心
益斥騶御而後衆稍定出見縷衣冠者諸倉曹河
泊小吏也滿秩當行前使疑其牒更歲月不得去
也粥橐中裝盡則粥衣裘衣裘盡則粥子女而後
困踣欲死公曰是不為天子吏乎柰何作楚纍白
御史而遣之凡一月而遣百餘人岳州上計而誤
登其數坐監守盜當戍者六百餘人賴公以免徙
河南左公為右時時補左之所不舉為左則益飭

周王者 天子叔父也有司不時供供不無侵牟
其間公給如制而無染諸王孫咸德之今主計者
患諸侯王大抵謂物力詘矣使吏盡廉平雖諸侯
王何望焉既為都御史撫巡四川蜀王居國富多
從其官屬為奸利闡出茶鹽公法之不假非獨惠
於周而嚴於蜀應俗遑事難以常條此古之所以
貴因也白草番為亂虜提督破縣諸大夫嚴平世
不敢論兵公曰 天子封疆吏負三尺劍行部柰
何憂夷余惟西土之管不難將尋斧柯廼都督何

卿計方略會陰霧形實擊虛奪其險以入擒其酋
五克寨五十毀碉房四千八百斬首千俘五百人
與降者約稍出賦視內地捷聞進兵部右侍郎已
又平馬猱番賜金綺敘瀘蠻反公方議兵中飛語
罷歸歸二年復為江西巡撫又一年晉南京刑部
侍郎未行而虜薄京師徵赴闕改兵部右侍郎時
咸寧侯鸞怙寵焰如火公稍持不下輒阱公請從
按行邊當是時京邊兵盡在鸞所而虜譖日至朝
士以為患乃請益募民兵使都御史商公大節領

之營於西城鸞又奪其兵而以空名檄大節防京
師大節劾鸞不勝下詔獄論死莫訟其寃者無何
鸞發疽死 天子戮其屍大節故所部民兵伏關
上書公方攝篆喜曰此可以生大節矣因為之請
且曰大節有國家心赦之必能死綏 肅皇帝怒
曰生殺朝廷大柄一小人妄上書輒為請如君何
錙俸二級而公之聲益高無何以内艱歸時倭跳
梁東南留都戒嚴召公墨衰為南京兵部尚書叅
贊機務寇突至城外遣將禦之不克當是時公到

官甫隕月而治兵疏十上鞭弭未施而分宜父子
披之遂老公年五十有五尚茂齒卒無有用之者
然得以其暇脩孝友之政與賓客賦詩優游又二
十餘年公奉親厚父母所愛者愛之父母所敬者
敬之歲時享祀必親自初祖下益置祀田撫二弟
周至視諸子猶子資群從昆弟無倦施無田與田
不能田又問公給作無廬與廬廬敗又問公苴葺
為母氏孫內氏陳計久遠咸令有植不獨二氏其
他姻婭交知自儕以上鮮不厚者儕以下鮮不迨

者匱恃以卹緩急恃以訖吾沈氏至今日望司馬
公雖其力足任亦天性隱惻故而公於鄉黨益親
公雖學于文定公而其歸殊文定密而醇公鴻而
槩文定之學長於六經公長於諸子文喜東西京
之際詩腴而和性好士門無留客即少年寒畯苟
力能勝觚者輒引以資已故後進之士稱東沙先
生始為進士時有騎馬來定交者曰王激子揚快
士也子揚死為刻鶴山集豐考功道生貧囊贏接
於途死為刻考功摘集陳東約之死公勒石墓門

刻後岡集其高誼如此所著有芝園集外集別集
所銓定本朝文為皇明文範別為文苑又為寧波
府志定海縣志萬曆丙子公遊於茂嶼賦詩為別
茂嶼者公別業也在東湖之汜其明年秋夢遊岱
宗賦詩覺而記之又一日而病不起實丁丑九月
七日也生弘治庚申享年七十有八配陳夫人生
子邦仁邵武尹娶工部主事戴公鰲女繼毛氏如
夫人者三任生邦伊順天府治中娶進士許公元
祥女吳生邦侗郡諸生娶僉憲黃公綬孫女王生

邦岱聘工部主事陳公三綱女余寅曰司馬公爵
什九矣而其施不能五六要纍伐而至之非有知
之也知難言哉公居常引體峻蓋尊者之曠節世
率以是求多公公固未嘗少也求多公胡遽不為
淺眇也沈一貫曰余童時望司馬公如龍迺今狀
司馬公何寥寥也疑五傳有軼文焉請諸子加博
竟略嗟夫英雋之生誰不魁然絕世而公如心者
半折既就功矣篋成紀卒可不朽者又半析以彼
其才藉令乘時邁用於陵厲四海為社稷臣何有

而著書畢志蓋司馬公自傷無奇悲夫士非日月之際惡睹靈采景曜哉然觀古今鉅工所既者廼如此象體鳳毛亦賢夫狸鵠遠矣

光祿大夫少傅兼太子太傅戶部尚書建極殿大學士贈太保謚文敏同麓余公狀

萬曆甲申十一月十有七日光祿大夫少傅兼太子太傅戶部尚書建極殿大學士同麓余公卒於官維時公長子廷槐葬水夫人於家次廷椿廷梓廷櫟從公長安視含歛無悔輔臣以聞上悼震

遣中貴人詣邸視喪發尚方白金玄纁袞麻疏布
香薪米鹽諸物賻宣 聖慈不勅之戚申命秩
宗考典禮祭九壇加賜二壇遣祠祭郎呂興周護
而南司空給棺歛都水主事張程營葬加太保廕
一子中書舍人易名文敏生榮死哀已其門人沈
一貫為狀公諱有丁字丙仲鄞人鄞之余在宋有
天錫識理宗於塵埃中而翼之以飛至叅知政事
典鄉郡卒贈太保謚忠惠後散居公之余則居東
門小江里父永麟閱覽博物經行冠一時舉嘉靖

戊子鄉試署浦江訓導崑山教諭通判蘇州府未任卒是為滙塘公以公貴贈編脩加贈如公官母王加贈一品夫人自滙塘而上疑其出滙塘公所後父曰櫛母曰丁實襁褓滙塘公而覆廸之而滙塘公至孝自有識來心知非而嚴大人不敢言滙塘公之再上春官也公以童子從嘗窺滙塘公與客屏語甚悲公跪請故則叱童子何知蓋語其出云而終滙塘公之世公年纔十五公恨之自公貴往往訪問故老或曰旗山余或曰馬鞍山余兩疑

之竟無左驗以此知公實氏余而不知誰余也當
贈三代喟然流涕曰吾少不天不能明其出顧所
後祖亦祖鞠育恩罔極安敢忘贈櫛及櫛父鏜皆
如公官櫛夫人丁鏜夫人王李皆一品夫人滙塘
公有二子長曰有壬次以丁亥舉公命曰有丁生
而穎秀淵徹博記善問疊疊論事不休長就學日
誦數千言讀滙塘公所藏書遍比結髮從之崑山
已就故滙塘公臨終執公手曰保重保重公謹受
教以保重名齋持滙塘公喪歸哭泣無度兩目為

壅幾眇三歲乃復用是不睹遠是時祖櫛暨祖母
丁前歿而伯兄復奄棄四喪在堂獨與水夫人奉
寡嫂撫孤姪而公臨想甚遠謂形家為吾營高敞
地葬同輿而自號同麓子己酉大司空古和雷公
來督學為邑庠生而今冢宰松坡畢公戊午來得
公卷寘第一榜未放而懼王太夫人憂有司若威
遠周郡侯莆田昌郡理惠安曾邑侯人人器重廣
陵郝封大豪也好竒節游公卿折簡周侯求塾師
周侯以公往封君年七十餘矣一見折節下之而

公於是抗顏於其壑者三歲所遂上成均中順天
辛酉鄉試明年壬戌第春官奉大廷對與今元輔
申公王公並及第授翰林編脩三公出入友愛如
同氣勇肩古道不屑為今人文章執於子長孟堅
蓋詞林中裒為一振焉乙丑充會試同考試官登
進三十二人多奇士而其最奇者則崑山歸太僕
有光太僕舉嘉靖庚子鄉試硯硯不群而以時義
落落久不收公得其卷賞歎此非歸君誰為之亟
收之果歸君初公以童子游崑山則歸君名大噪

於時將執經門屏不果而後為歸君主進制體為
之一變本公得歸君力也是歲乞假葬王太夫人
遠近來觀其所謂高敞地者丁卯赴闕 莊皇帝
新御極覃大慶公又與申公王公並典 制誥昔
之典制誥者請謝之屢常滿而三公以為代 天
子言私其賄辱國甚謝客不內一物已克 肅皇
帝實錄纂脩官又充經筵講官戊辰又充會試同
考試官得士復三十二人而不肖一貫濫竽幸未
陞國子司業飭規勵行六館之士踴興壬申改洗

馬兼脩撰充東宮侍班以今皇帝在東宮出閣
故復改右諭德兼侍讀加俸一級移疾歸以左庶
子掌南院事便之家登泰山觀孔林陟靈巖而歸
卧於四明之東湖公素有山水癖買山東湖中茭
菰之得古洞以杖扣之鏗如地門發之則豁然曠
宇上盡浮石蓋古佛宮云疏峰披道分流抗石匝
樹於其側慨然感陶公歸來命曰舒園庄曰五柳
樓曰舒嘯齋曰覺是臺曰矯首有終焉之志州縣
迫逼不得已一之留都甲戌遷南祭酒南士多英

華然輕心不敢以怠皇傾軔也監多鏤板自張文
定奉命校勘以來至是漫漶公手讐史漢暨齊梁
等書更鐫之丙寅復移疾歸東湖讀漆園之書疏
之若干卷藏于山戊寅起少詹侍讀學士掌翰林
事未到官陞太常卿管祭酒事上疏辭不就而二
三知已移書稱大義乃逡巡抵都臘焉己卯陞禮
部右侍郎兼侍讀學士仍充經筵講官庚辰改左
掌詹事府與申公典會試得士三百人已改吏部
左宰已解部事仍掌詹事府充會典副總裁會典

國家大憲章而篇帙浩繁所定義例多冗紛公受命窮日夜之力正名創例搜典據實刻日削青而是時公三品滿簡注深矣賜羊酒鈔錠廕一子國子生無何奉特命陞禮部尚書兼文淵閣大學士入閣辦事壬午六月也時江陵新物故朝政多釐而公與州蒲張公申公共圖新之贊臣璫之獄海內曠然望太平而浙兵不靖戕其幕府公遣少司馬張公往與張公言是反側者方廩廩未定必綏戢其人而震之以法共此功者故帥徐景星其人

也今失職待事薊門挾之去而吾從中無憂公功
奏矣張公遂挾景星南而景星入亂軍中以數語
開說交辭受事已縛其魁梟之浙遂安是歲九月
皇子生加太子太保禮部尚書兼武英殿大學士
蔭一子癸未與欽許公典會試得士又三百五十
人公連典會試程文典則高古海內士望為指南
九月從上定壽宮加少保改戶部尚書武英殿
大學士甲申遼東師獲長叩上以輔臣實贊廟
謨世官皆辭不受賜銀幣暨蟒衣一襲自江陵

敗言者猶搜剔不已至有言舜禹之事大臣持大
體懷遠慮論不合太宰楊公及申公皆避位而許
公以去就爭之二三大臣多求去獨公內直為
上分明之居數日猶未定乃上疏言言官可信諸
大臣尤可信以一言官不用故而使三大臣求罷
非盛世事元輔才識精敏善煩劇久叅密勿尤諳
典章檢束操履無毫髮私而次輔朴忠自許素厭
輿情學問優長足備顧問皆一時極選臣萬不及
如聽其去則臣愚亦有去惟 陛下留魏以安二

臣或降手札以示殷勤或遣中使以申慰諭庶人
心定國是明也以上感悟降手札命二中使詣兩
輔諭意而太宰亦復位二三大臣始安是䟽也人
謂公回天之力咸喁喁凝目冀其來澤而疾作矣
自七月後在告時時咽逆上數遣中人詣問太
醫診視又以雲南大捷錄運籌功加少傅兼太子
太傅建極殿大學士廕一子中書舍人固辭不許
三乞骸亦不許至是終長安邸第先是水夫人以
壬午卒上特遣工部郎往葬公乞營兩窆上

許之葬在東湖隱學山蓋公素達生生時奉養甚
備而去來之際若遺矣公為人開爽弘豁洞無城
府與人言出肺腑相示天下信其不欺才譎敏濟
善用群長咸使輸其力勞謙靡已從善如轉圜天
下信其不矜大雅含弘多可而少恠包括山藪天
下信其不恃少有高世之志委懷魚鳥不廢絲竹
長想遠思縱心物外雖跡近人寰而羞逐時名天
下信其不染所居之處一日必飭丘壑亭館樹植
蒔灌咸得其次若舒園嘯樓未嘗一日去口有江

左之風為文章博瞻瑰瑋如上腴奧區華實之毛
悉附如介丘千仞峻高巉絕論天下事犁然有章
欲因勢而成之所居雍容文學侍從官無可效雖
大拜與二三元老協恭和衷謀斷相成不見其功
然夾輔聖明計安社稷長率百僚咸秩其序此之
為功視戔戔萬矣捐館之日士大夫皆惋歎語曰
樵李不言下自成蹊公之謂哉公生距卒之日享
年五十有八水夫人鄧之著姓四子皆其出廷槐
娶太宰聞莊簡公曾孫女廷椿娶方伯柴公涑女

廷梓娶刑部檢校屠君本峻女廷櫨娶光祿卿趙
君參魯女皆當以公任授官女三長適庠生包宗
魯次適宗伯汪公鏜子宏科次許光祿少卿張公
子瑫子某槐之子經訓庠生聘不佞弟工部主事
一中女某訓甫在襁褓三女一許進士丁君繼嗣
子某一許南京工部主事王君佐子某一許甌寧
尹吳君禮嘉子某椿之子書訓聘國子博士高君
萃女文訓聘分宜尹周君應治女夫以公之胸懷
停澈淵海莫量而曾未見萬分一以公之神姿堅

峙金石可銷而曾不能周甲子以公之勲爵在三
事之上與同心同德師師一時而竟為短晷所奪
世與人恒兩遇之難也然公嘗與不佞言人不能
建大名舉大功有詔於永久即幸無瑕類以愧其
稱亦可謂生順死安公其生順死安矣是用短述
以干大雅鉅公

光祿大夫柱國少傅兼太子太傅禮部尚書
武英殿大學士贈太傅謚文安期齋呂公
行狀

歲丁亥六月甲子光祿大夫柱國少傅兼太子太
傅禮部尚書武英殿大學士期齋呂公卒於家守
臣以聞 上輟朝賜祭九壇遣行人王堦造葬贈
太傅謚文安給誥命廕一孫中書舍人子元等深
墨再稽徵狀公諱本字汝立呂姓呂出太公望而
公之先為唐浙東節度使御史大夫延之宋太師
中書令端知諫院諫議大夫權御史中丞誨皆譜
可徵誨孫億始居新昌又八傳至貴義始居餘姚
新河之陽貴義生德玉當 高皇帝時新定籍訛

為李德玉生原實原實生友直友直生公瓊公珍
公珍生懋改後公瓊是為公父醉夢公自公瓊公
珍懋改俱以公貴贈少保兼太子太傅禮部尚書
武英殿大學士曾祖母蔡與潘祖母胡俱贈一品
夫人母楊封一品太夫人國家以孝勸忠一品官
得封三代 肅皇錫類于天下又令為人後者得
移其封於本生父母乃至推及于本生曾祖又特
為耆碩加異典諸臣莫望焉隆慶三年始疏復姓
呂初號南渠晚謂人生以百年為期學以聖賢為

期顏其齋曰期而門人遂稱期齋先生弘治甲子
六月朔太夫人夢日而生幼而岐嶷謝太傅文正
公竒之曰此兒峭健有氣力異日遠到倍我遂留
讀書於汝仇湖命子學士丕課之同業者鄒公絢
諸公變皆一時名士世稱文正知人也正德辛巳
娶夏夫人嘉靖甲申謝學士北上載醉夢公及公
與俱見鉛山費文憲留與子同學乙酉當比士人
或謂公何不遂籍順天舉乎公謝不敢歸以儒士
高等試於鄉克第子員而醉夢客死謝公所公聞

之慟毀朝夕一溢米偃伏苦次終三歲不能興戊
子以遺材舉於鄉己丑游太學大司成魏公校少
司成林公時咸器公壬辰第春官賜同進士出身
是歲十月 肅皇命李文康選吉士 上閱卷見
有彌封不密者心疑私報罷編脩程公文德請親
試於文華殿乃得呂懷等二十一人公預焉 上
嘗問李公諸吉士誰可大用者李公以公對當是
時 肅皇已識公名矣比散館留翰林者六人而
公為檢討乙未充會試同考官得士十六人持節

封汝寧潁川二王便省其太夫人其冬奉太夫人
如京師丁酉充經筵展書官校對列聖御製
文錄滿攷贈醉夢公檢討封母楊太夫人妻夏孺
人戊戌充廷試掌卷官已陞南國子司業翰林外
國子而遠南畿次者不欲行言於李文康謂汝立
願往文康召公而問焉對曰百官惟朝廷使理無
自擇遂拜而南所歷大司成關中馬公汝驥安福
鄒公守益懷安龔公用卿南海黃公佐金華程公
文德凡五公五公者迭用寬粟而公濟以中和所

育材以千計至其正講席定序卑儼脩絕倖謁
至今著為矱式壬寅公以考滿當赴京留太夫人
於家太夫人病痺公侍湯藥不能去以簡書故不
得已一北上而歸踰歲不赴官同官促之廼留夏
夫人侍而身之官久之日夜念太夫人擬假歸太
廟成因捧表入賀覲太夫人於家公為司業者自
戊至於乙最久而無幾微於色已改右中允視南
院中允與司業皆六品得通考再滿赴京五月改
左中允掌篆八月上命公及右贊善吳公山典

試順天公嘗言治以一統為盛勢以不移為尊人
心雖衆知有天子而已命題以禮樂征伐自天子
出大稱 肅皇意錄上 上大善而字標之竟篇
於是彌心嚮焉丁未充廷試受卷官戊申陞南祭
酒隨改北已酉益置輔命廷推所推擇冢宰聞公
淵南冢宰張公治少宰徐公階南大司馬韓公邦
奇少宗伯歐陽公德及公而六 上甚悉其事旨
十日不下而密迹六人者十一日特簡張公及公
以少詹事兼學士入閣辦事少詹猶四品乘馬公

疏辭不允居閣中無事不欲優逸檢故牘作館閣漫錄續脩大明會典充總裁官隨召直無逸殿賜銀幣庚戌充廷試讀卷官取桂林呂公調陽禮部上恩榮宴圖疑公坐分宜擬坐三品上上特命坐二品末蓋三品旁坐二品上坐肅皇優禮儒碩而折衷典禮如此其秋陞吏部左侍郎兼東閣大學士虜逼通州群臣請見上御永壽宮特目本與階曰二卿久失相見公與徐公各謝公因條禦虜之策上稱善傳諭舉行虜退復上言薊昌

等處暴骸可念乞掩埋蠲賑以收人心又乞整飭營兵以善後上趣所司議行辛亥禮臣請建儲上問公公對曰自古帝王莫不蚤建太子以正國本本朝東宮諸王年十五則選婚制也顧東宮諸王異禮今二王已長讀書選婚正其期亟宜正名如禮臣請上以己酉春事為難己酉春事者謂莊敬太子早世不利儲也公又言天授元良自有定數不可以槩論上置之是歲考察京官上問考察及邊事公條對且言連日風霾虜情叵測

要在預備為急時咸寧侯鸞用事齟齬都御史商
大節分其軍大節訟鸞上怒謂秋防近而推避
下詔獄法司當斬公言大節可原律稱領兵官已
承調遣不依期策應失誤軍機者斬而上譴大
節不過謂推避不宜當臨陣失機律不納鸞又言
虜且入寇請身領京兵禦於內而出邊兵待於外
又請載軍糒以自隨恐虜因糧聽將士食民禾公
言調邊兵以衛京師也而今待於外臣不識鸞何
意軍之所至有督餉存而復載糒行徒滋煩擾古

之善軍者卒擅取一物立斬而欲縱軍掠稼尤非
所聞也鸞又議與虜市兵部爭之上問公公對
曰虜日變不可以互市狎也今徵兵四集正宜決
戰以彰天討不可任其要挾徒示弱於是上決
意以戰守為事十一月以平某賊賜銀幣羊酒及
人口二故事有賜奴功臣無及文臣者及文臣特
恩也因陞禮部尚書兼官如故壬子禮臣上二王
冠婚儀以東宮未定不敢請出府乞暫舉宮中
上曰諸王出府成婚例也豈宜宮中公對曰先年

五王出府以名位等他日皆當之國故爾今冊禮未行事非前比否則二王當有分別上竟不肯分別令二子同體乃命以明年三月吉冠八月吉出閣講讀九月選婚癸丑春公又言二王婚留內則保護便此天下臣民所瞻仰且諸貳未定而居外使人心危先朝有太后有中宮有東宮故主上體勢增重而尊安今骨肉唯二王聖躬不可不慮疏三上報曰卿所慮皆不足卹人無能勝天其俟後命是時侯鸞敗更定戎政者再擬議多出公手

徐邳大水公請大農議賑司空議漕渠禮官祭河
岱沂金龍廟等神上皆納之上又用給事中

朱伯辰議築外城且曰不四面非王制也公言先
築南面併力可完此天下財貨湊集所他三面宜
更議報允而城竟一面矣其冬又上言臣奉密對
屢以建儲請閱歲淹久未即俞允今內外臣民謂
此大事而置不講臣等何以辭請及開歲諏吉舉
行於是上雖未報而意有注焉甲寅榮淋康妃
發引妃昭陵生母也昭陵跣送西直門公從

昭陵勞焉以外城成加恩子元中書舍人八月加
太子太保進文淵閣大學士遣視天壽山還言山
水衝決之故授子允中書舍人寧安公主筭選附
馬是時中宮虛上以公有人倫鑒命公徃取李
和而司禮人人賂抑和第二公奏上竟用和丙辰
充會試考官已冢宰缺請擇所堪特命公暫署不
奏事承旨又令公分別內外大小諸臣為三等聞
公言外吏之考察比耳在內之小臣衆臣不能周
可勿考惟大臣小臣之倡也敢不奉詔上許之

廼悉錄兩京部寺科道及在外督撫等官次其去
留以上上曰輔臣本暫掌銓務奉公忘私甄別
既明宜加恩獎可少保兼武英殿大學士餘如故
丁巳七月滿一品三年考賜鈔錠羊酒進階光祿
大夫勲柱國廕一子入監讀書給誥命八月加兼
太子太傅賜蟒衣銀幣公念梓里數中倭致書督
撫言餘姚民夾江居江以北故有城然多圯江以
南人倍而無城倭卒至其誰與守請並城如通州
胡公宗憲建之檄郡守視之諸少年更以為厲也

焚公所聚材數千章公聞之歎曰吾以衛民而人反訴其未奉成命乎乃令子元及正郎邵公惠乂侍讀陳公陞居江南者二十餘家疏於朝得俞而城成譁者更來德俎豆公於龍山 上感兵部郎中唐順之奏問邊兵入衛起何時公對曰祖宗時嘗調土兵未有調邊兵於內者邊有境則發京軍往正德間山東河南盜起始調許太邵永兵於邊其後江彬以宣大兵扈南巡識者憂之謂此輩見京軍弱必且生心果有大同之變庚戌後逆鸞奏

遣四御史發邊兵入衛歲十八枝尚未守薊何棟
為總督謂薊鎮選練盡調入關暫借二枝防守邊
兵戍薊由此始年復一年調且不已因循之政也
時光祿歲用銀以三十六萬兩計上疑所司多
乾沒問狀公言祖宗時光祿歲額二十四萬兩而
歲用不過十二三萬四郊工起當借數十蓋取此
乃後歲用日加雖裁節猶三十六萬因條上四弊
一曰傳取錢糧之費一曰關支酒食之費一曰門
禁之費一曰磁器之費上省疏因遣御史一員

月籍其費以進巡視光祿由此起己未復充廷試
讀卷官得清河丁公士美為首庚申六月滿一品
六年官子允中書舍人兼支大學士俸給誥命遣
使賜鈔錠羊酒公請移封其本生曾父母上特
並給不移八月加少傅是時上春秋高國本未
建二王並居外邸前中允郭希顏請建帝立儲觸
上怒見灋公密奏曰皇上萬壽無疆而小臣請
建帝死固當雖然二王並居人各為其主矣希顏
請一住京一之國語亦當省且上嘗謂天倫之

序默定已义第鑒已酉事不欲冊誠因其序而或
留或遣以定人心即無冊亦可 上大感悟十月

諭內閣景府成已數年何久不之國其即舉行當
是時 肅皇諱言儲言者不測二耦相疑妄揣摩

窺伺者不少而公獨以危言光啟隆萬之治功不

細 上傾心公公亦以天下為己任不幸楊太夫

人卒邸中 上念公銜卹不可留給傳符行人護

行所以弔賙者具給予元扶侍仍賜札存問公持

喪還葬太夫人於慈谿之龍山遷醉夢公合倚廬

慕若孺子云公束髮升朝十七年起拜相相十三
年分獻南郊者四饗地者二祭帝社稷者六顯命
祀先師者七凡決大謀議大政興大役皆孜孜盡
瘁不私其圖讀禮之後自以為大臣受恩深不當
以江海忘闕廷遇大慶則脩賀遇大典則脩助而
上亦念之每輔臣闕必言呂某可而數為人尼止
永陵哀問至公哀踊欲無生云高皇帝法田有
賦身有庸而時久弊滋奸胥飛灑不可詰田與賦
常相失或糧存而田亡糧多而田窳也徃徃苦里

甲代賠公白於縣力主清丈之議既清丈隱田出
矣復念鄉則繁多奸歲無所發又力主均則之議
而田賦為之肅清田賦既清民復訴徭庸之累徭
之法二有力差有銀差力差古差役銀差古顧役
也往者嘗無用兩法皆善而積溺以來有榜一金
費百金者逋逃望於道公於是又力主均徭之議
均徭議者謂徭者十歲兩徭雖逸四而勞一然當
徭則勞愈甚而加以貴官大家之優免多奸胥里
豪之詭弊多故徭益少而愈困公議歲盡徭其民

毋復輸年徭惟視賦即貴官大家與齊民同毋復
優免縣每歲計需幾何金而徵之自為費毋復煩
其民於是民雖歲歲徭而以銀不以力所輸銀復
少於舊易舉公且盡出其優免田而輸官當免者
服其公亦罔不聽令布之日歡然更生焉詳具翁
中丞大立均徭或問中公既以此法行之餘姚而
龐侍御尚鵬來按浙善之聞于朝遍行於浙中同
邑周中丞如斗又行之於江西今且遍天下矣公
九世祖墓在新昌躬往葺之置祭田若干畝貴義

府君而下墓於餘姚者置祭田若干畝山陰舊有
祠復葺之具諸學士大綬記中陽明先生倡良知
之學其教大行於江右浸淫吳楚間而梓里後進
不識公乃搆書院與陽明高第王公畿及大中丞
趙公錦時往復焉後學為之奮興晚常居餘姚之
玉蘭堂 今上之癸未公八十特命撫按官及門
存問月給米四石歲撥人夫六名以備任使初謝
文正罷相優游里中廿有餘年年八十 肅皇特
加存問乃公以黑頭讀禮亦廿有餘年而存問之

日守臣以文正例例公埒德偕年童子時所稱遠
到倍我者斯徵哉又三年丙戌夫人夏氏卒賜祭
賜棺遣中書舍人黃某起冢未及期為丁亥六月
朔公弭日也子孫遞奉觴越六日語元等曰我受
累朝厚恩無以報稱汝等第教訓子孫效涓埃之
力吾目瞑矣遂卒年八十有四公夷粹醇厚平居
無疾言遽色覲人無少長齊禮脩己郅不脩人之
郅故內外無惡于人好施予自內外親暨嘗一飯
者無不被其賜戊辰邑大饘公出囷穀千石為賑

公嘗言惟恐權之不去已惟恐利之不去已惟恐
名之不去已緹騎貴寵時求媿公公謹謝絕當時
二三用事互以姻媿為石交而公獨皦然以免人
服其遠識其中充然若虞敦夏璉而自視若缺不
以矜於人繩束子弟減獲又斬斬有濫鄉之人無
間言好學彌篤所著有期齋先生集奏謝稿館閣
漫錄行於世夏夫人婦德最著具朱少宰邵中丞
誌狀中公未第時夫人為置貳室朱氏以子允贈
孺人又置傅氏兩王氏者一為博平王一為京師

王子男六兄禮部祠祭司主事娶教授鄒公女封
孺人兄中書舍人娶郡守封都憲邵公女封孺人
充石阡府知府娶寺丞謝公女繼劉氏父禮部精
膳司主事娶尚書孫文恪公女封安人覺監生娶
郡守陳公女魁光祿寺署丞娶貳守胡公女繼上
舍洪公女女三辰適管叅政公子興都留守正海
成許太傅謝文正公孫用模用模年十五舉乙卯
赴南宮試發痘歿於途成誓不二絕食卒稱貞女
祿遼尚書陳文僖公子鑣早世此六子三女者元

及女辰夫人出允朱出充允傳出女成及覺東昌
王出魁及女祿京師王出然夫人視之均皆不知
其出也孫男二十有一胤昌癸未進士寧國府推
官娶潘少叅女封孺人夏夫人既賜葬于蘭風鄉
姜山之陽兆成而公當從之子元等且乞銘於立
言鉅公謹狀如右

資政大夫禮部尚書兼翰林院學士遠峰汪
公行狀

遠峰先生居鄞虹橋里與不佞一貫共衙門不佞

髮未燥而先生已舉于鄉後二十年奉先生詞苑服令猷酬寵訊比在告而先生捐館舍哀哉公初諱鏜孫既貴以義無所取請于上去孫而獨以鏜行字振宗人稱遠峰先生汪之先越國公之烈著于歛子孫散居而公之汪則所號東門上路者泰亨元時為慶元路都目阻兵不及丘首入國朝占籍為鄞人泰亨生仕芳仕芳生思溫思溫生公憲公憲生溶卿則公大父贈禮部尚書兼翰林院學士溶卿生子晁則公父贈翰林院編脩文林郎

加贈禮部尚書兼翰林院學士母丁氏贈孺人加
贈至夫人贈公有側室生子伯金而丁夫人生公
及季鏐金貢士鏐邑諸生公其仲公之始妊也夢
雷電煜煜已有異香在闥間心儀之為佳兒秀穎
嶄嶄露頭角贈公嘗摩其顙曰吾門族兒大哉盡
屏諸嬉戲具而獨程其咕嗶時其游息饑飽而廣
其耳目以蚤成其令名迄今邇善教子者必曰汪
翁年十四以戴記游于泮鄆諸生故善易畧為戴
記者舜江謝文正公與公族祖澤卿同年舉也嘗

謂贈公論戴記贈公好之命公負笈之舜江遊長者故鄣有汪氏禮而陸康僖之孫文和善相人覓壻壻公公年二十三領甲午賢書數困于春官姑蘇沈中丞請為諸孫師公于是益廣意于大雅之林癸卯贈公卒襄事以禮丁未上春官時西蜀陳文端校禮經為本房冠比大對第高改翰林院告士己酉授編脩壬子滿三載父母暨配皆拜命癸丑充會試分考官隨歸省甲寅復任受命教內書堂內書堂者諸少闈所業也公每為譚小雅荅伯

以下保其專良之志丙辰充殿試掌卷官丁巳滿
六年考戊午持節封衡世子為王己未滿九年考
陞侍讀庚申管理文官誥勅壬戌再充會試同考
官校春秋得今太倉相公今總督張公國彥尋清
理軍賊貼黃陞右春切右諭德往視南京翰林篆
明年署南京國子監事留都士驕公訓督以禮甲
子回坊復管理文官誥勅秋典應天鄉試孫公世
芳副而孫卒于行公既經紀其喪而簾以內事獨
身董之周慎無失所收士先後多顯者還充分校

大典官乙丑再充會試同考官是歲校尚書得范
公應期為廷對第一人丙寅陞國子祭酒頒五倫
條約禁止超薦及清餼廩之乾沒者以給諸生其
冬擢南京工部右侍郎於是 莊皇帝御極為隆
慶丁卯所司奉開讀事例改公別衙門用無何以
大典錄成陞俸一級己巳補南京太僕寺卿仍支
正三品俸自陳乞罷復以母老身病辭皆不允隨
離太夫人艱辛未復為南京工部右侍郎壬申改
南京禮部管國子監事充經筵講官癸酉 今皇

帝初御經筵賜白金文綺二月轉左回部管事仍
充經筵講官充實錄副總裁甲戌充知貢舉官其
冬考三品滿蔭一子乙亥被口語求罷上特慰
留之穆廟實錄成陞俸一級丁丑復知貢舉八
月改吏部左掌詹事府事教習庶吉士世廟實
錄成陞禮部尚書兼翰林院學士戊寅上兩宮
徽號覃恩及父祖公倦游矣固以疾辭疏四上
許致仕給驛歸賜鈔幣公天性凝雅斤斤矩折規
旋寡言笑無町畦可尋起詞科三十餘年在嘉靖

間時方沉濁不可以莊語而公游優奉璋橐筆亦終無黷染隆萬來雅意獻納又潤色兩朝實錄與大明會典然居常不樂乞休之疏歲有蓋自謂器非時適矣公既貴益恬澹寡好務以大體自持歲時伏臘享祀必虔撫昆弟周至濡酣群籍課子孫誦讀戊子大禋出粟賑卹姻族以次復捐貲縣官鄉里之全活者甚衆余文敏之葬公送之石碣其足至是病再作知不可為呼子孫誠之曰余起一介登八座遭矣而國恩未報萬分一爾曹勉之是

為戊子十一月二十日也距生正德壬申二月初五日得年七十有七子男四宏凱南京右軍都督府經歷先卒娶俞氏贈孺人繼屠氏封孺人宏裕光祿寺監事娶徐氏繼范氏毛氏袁氏吳氏宏忠亦監事先卒娶楊氏宏科邑庠生娶余氏大學士文敏公女伯仲叔皆陸夫人出季側室王氏出孫男十一尚德邑諸生娶包氏罔簿某孫女尚倫邑諸生娶管氏方伯大勲女尚賢郡諸生娶金氏學博章女尚賓郡諸生娶范氏少司馬欽孫女尚尹

娶樂氏郡守舜賓女尚鵬娶杜氏副使思孫女尚
夔娶董氏翰撰樾女尚俊聘傅氏刑部郎文藻孫
女尚綱聘聞氏太宰莊簡公孫女尚縉聘陳氏鄉
進士起龍女尚傑未聘孫女十一沈一貫曰往不
佞狀文敏公今復為公狀典刑數亡吾鄉遽焉岑
寂吁嗟傷矣公在仕籍久冠冕儒臣人且謂之南
山而卒阻天鬻諸所崕略不佞既不敢以誣諛逝
者而又不取以豔固立言則投觚再四豈公之素
僅是乎抑諸子震裂憤亂十而不能舉一也蓋公

不善于要路以蘧蔭戚施為羞即晚節江陵貴倨
甚公與之無款曲直柔而已噫信不必見賢不必
著彼炎炎隆隆者多不卒而公更傾危思殺之中
善沒于地情與貌其不變公之節著矣不佞聞之
公子云 先皇帝裕邸時將以公侍講讀有祈得
之者公輒讓講讀南院篆缺將以某往某祈留擠
公公亦不避往自不佞見公雖晏驟爾雅外無媒
詞詳略以衷無熱腸亦無冷腹醇端體要前後如
畫一蓋詞林前輩之度若此而公持之益壯比見

夫後進之士風蕩波靡務習曼苟愉以媚俗人或
乃唆佞萬狀餽鱗介之一羶日失其序前輩風流
略盡夫士固有體體之不直文安附也君子遐想
于公可以惕內省哉公所著有禮經訓解若干卷
餘清堂定稿若干卷典則不詭無汎剽之義如其
人云

工部虞衡主事王君暨配沈行狀

王君余鄉同年又同郡人其安人以隆慶四年八
月二十日卒王君請余志之未幾而王君亦卒余

合狀焉王君慈谿人名朝陽字仰明曾祖暹祖仕
父愷母桂孺人桂同邑望族也君自髫時治春秋
日記數千言為諸生鄉先生二千石陳公見而異
之問聘婦乎曰未也令室安人安人者真州人也
父沈某為饒州司獄生安人十歲習女紅通列女
傳司獄有女兄為陳公側室常往來陳公家言吾
女當予貴人於是陳公言王君無何陳公卒司獄
來哭之遂與王氏盟越四年而王君之真州以安
人歸然王君屢困有司常遊學於四方安人執片

明史紀事本末卷一百一十五
曰以養其大人桂孺人早世安人以不及為憾忌
日必慊痛視具屢娣姒宜馭下有恩王君欲嫁其
女而什九在外安人自為資不煩王君其敏幹如
此王君既久不為有司所推擇輒言命以慰之王
君曰士方困時使室人不免於謫誠不堪吾忘吾
之不遇也辛酉王君舉于鄉乙丑舉進士為行人
致弔贈於淮王王餽之王君無所取 今天子御
極王君當封請以封其父明年立 皇太子王君
廼得封奉詔諭淄洛湖湘廬鳳彭城間因覲省已

已還京師復奉冊封唐山沁水廣靈三王至雲中而歸王君凡三使皆有紀及其紀晉累累數千言道邊事如指掌志士哉還省虞衡主事監戎器

天子大閱士卒賴其用是歲七月而安人舉幼女病瘕以卒王君哀之甚也十二月王君旦猶卧侍婢薰衣不戒而焚君匍匐救之廢於火旬日死王君為人大體與人交必盡誠不苟焉曠其官其殞也僚友歛錢佐之有中官竊進者保定人偕君監戎器德君之厚經紀其事甚悉進亦以是有聲

於縉紳間也君生於嘉靖戊子年四十有三安人
生於嘉靖辛卯年四十子二一麟娶鄉進士葉應
山女一鶚聘符丞袁大輪女女三長適指揮趙光
孫允元次許嫁工部主事張大器子某三即驚其
母者方付乳媪以虞水火以三月某日發紼就道
歸葬於慈谿

封編脩沈肖山先生暨配俞孺人狀

先生沈氏諱弘光字道孚父曰兩山公東嘗疊石
為兩山以娛老先生因號肖山識弗忘也系出武

康家平湖所居為泖上石庄里世世受農業四世
祖江稱稼翁稼翁生悅耕公鏡鏡生東洲公溱而
始大是為兩山父兩山始習尚書為邑弟子員升
大學少孤事庶母孝撫小弱弟炎無間言娶毛憲
副女而生先生先生十二年而母皆父累然憐之
不欲苦以誦讀已病脛瘳二十餘始起室俞孺人
無何俞孺人卒娶今孺人張二十五始習句讀學
舉子文兩山公嘆曰日云暮矣胡能千里苟延年
榮貴非所望也先生曰夫讀書非獨為榮貴也譬

之田作大人既以種播矣不肖乃弗克耰鋤後來者安所識疆畛哉顧稟家學以泚其軀傳于來體兩山公竒其對縱之學負笈明師之門補邑弟子員入學大有名顧弗第而中更兵荒困於徃先生又力耕而息之未四十又病棄業晚以子懋孝貴值今皇帝嗣位封編脩兩山公晚卧疾躬湯藥者數年父疾為再起自傷不及其景歲時祭必泣又善施顧不及僧尼道士多在三族朋友間兩山公有姊嫁陸公而貧先生為置膏壤歲入粟如千

鍾醫復者嘗已先生父瘍先生憐其老無後為娶妻長子經紀其家兩山公所撫弟炎者初毛孺人乳之與先生少相狎也比長而知為父行不敢踰禮提携其子弘忠弘思弘德甚厚族弟弘輝弘烈皆嗜學則躬收而誨之母弟弘美早世命少子懋嘉後之撫其孤女嫁馬湖太守俞南金為子婦存其嬪妣思而有禮有妹嫁松江諸生張時舉貧而多子子畜其子傷俞孺人天予財物周其昆弟姊妹張孺人有西氏姨貧收其女為己女嫁諸生曹

國珎其甚善可師者先生持家訓子之法訓子衣冠遇之其莊少有過閉闥不言不食長老為逋請尚餘日未解故不答而慄自能食能言輒為法式冠則加嚴婚而嚴益加閨門之內肅如也外內為重門數十鑰從枕上過常語子曰治家宜如是家衆大小千指作教條數十月集而讀之犯則召對狀先生之再病痿也曰夫天道一元氣耳必成於貞人心一愛德耳必歸于正作愛正編一庵唐先生見而好之為之序而傳之先生益自信收後學

而教之子弟從者數百人素自重簡出州縣希見其面賓飲於鄉亦不往其亢潔如此常著均平議言田賦徭役之事于有司務鋤豪右蘇小民有司酌其法半用半不用未卒前十日猶欲詣闕言又慕宜興徐氏無錫華氏之誼置宗子田作宗法未行而疾與懋孝書兒宗子也必行吾志臨沒囑諸子曰吾念宗法條貫未具宜以吾意善行之今可久吾且瞑蓋先生才善志高其未竟者多也享年五十有九俞孺人者先生元配也同邑定齋之女

少端靖憲言咲容止峻整侍立終日不移及歸先生內外咸宜孕七月而生懋孝十日而殞年十九張孺人繼之慈厚自餘子女皆其所出曰懋莊懋時懋嘉皆邑諸生嘉後弘美懋孝娶於錢一子曰瑞鍾三女有側室子一未名懋莊婦于子曰瑞錫一未名女三人懋時嬪曹子瑞鑰二子未名女二人懋嘉婦俞子二未名女一人先生長女壻諸生趙志基少女未嫁字于趙國禎將以今年月日合葬于祖塋之次懋孝之直東觀也一貫為同舍郎

每舉其大人言稱之既訃一貫往弔嗚咽而請狀不敢辭先生高明卓越遇事不以芒刃斧斤常微解晚益峻節蕭侍御行部至界中有諸生數百人言先生可師使人以幣先匿不肯出謝開府滕督學交口而歎旌為宿儒假以數年德當靡劭風當愈遠而惜夫不少留也

休寧王孺人程氏行狀

休寧王君余同年友也為吾邑令明年其配程卒休寧程大姓梁將軍忠壯裔曰文昌坊程又程之

大者也居邑東南隅程公娶於陳無子嘗往來販
於大梁娶側室劉生子女四幼者為孺人孺人蓋
劉出而稍長奉母陳陳亦視為已子退而事劉劉
病躬調藥劑執劉喪幾以死殉已恐傷陳心陽收
泣更好好語相藉陳心知之益重孺人孺人未字
者十有七年足未嘗踰閭域程公曰男不如也王
公聞而為君委禽程公為人負氣骯髒傾其訾與
仇訟比孺人歸不能具一奩而孺人不以為困既
歸王王亦落姑抱危疾姊姒相勃谿絮絮不絕於

耳而孺人處之若無勤劬萬狀竟不告勞休寧俗
織笑王生所為咕嚕矻矻曷不移其力行賈可衣
食也人以諷孺人孺人曰儒丈夫事也十餘年諷
笑者益進而孺人益堅使王君樂而忘貧歲丁卯
王君舉應天戊辰進士孺人則已病滿其冬王君
拜鄞令己巳夏王君具舟楫迎毋强奉姑至官兩
月益憊王君不忍去前則感然曰官務繁柰何以
床第女子妨百姓今裏糈街亭不得去夫君服官
有聲我瞑矣廼卒年三十有一所生有二女王君

名之臣夫王君豈不良吏哉邑自兵興來遭時溷
濁墨吏與豪宗更相結往往鞭撻攘竊於其間隆
慶改元朝路清夷天下忻忻向榮而吾前令不溫
席去者數人尚未有主自王君來始輯綏之丁時
大水民無所得食徹王君將無流離瑣尾乎王君
自謂有內助信然觀其易簣數語若偉丈夫知理
道者生平儆戒可知矣